

Inatsisartut suleriaasiat § 37 immikkoortoq 1 naapertorlugu matumuuna Naalackersuisunut apeqqutit imaattut saqqummiuppakka:

- 1. Ukiuni tallimani kingullerni Ilinniarnertuunngorniarfinni fagi kalaallisut niveau A soraarummeerfigalugu nunatsinni ilinniarnertuunngortarpat?**
- 2. Ukiuni tallimani kingullerni Ilinniarnertuunngorniarfinni fagi kalaallisut niveau A soraarummeerfiginagu nunatsinni ilinniarnertuunngortarpat?**
- 3. Ilinniarnertuunngorniarfinni fagi kalaallisut niveau A soraarummeerfigalugu nunatsinni ilinniarnertuunngorsimasut qassit Ilisimatusarfinni ilinniarnissamut akuerineqartarpat?**
- 4. Ilinniarnertuunngorniarfinni fagi kalaallisut niveau A soraarummeerfiginagu nunatsinni ilinniarnertuunngorsimasut qassit Ilisimatusarfinni ilinniarnissamut akuerineqartarpat?**
- 5. Ilinniarnertuunngorniarfinni fagi kalaallisut niveau A soraarummeerfiginagu nunatsinni ilinniarnertuunngorsimasut Ilisimatusarfinni qinnuteqarneranni immikkut akuerineqar-tarpat?**
- 6. Ilisimatusarfinni kalaallisut oqaasillit pitsaanerusumik periarfissinnissaannik Naalakker-suisut eqqarsaatersuuteqarnerpat?**
- 7. Kalaallisut oqaasillit amerlanerit Ilisimatusarfinni ilinnialernissaat anguniarlugu, qallunaatut oqaasillit Danmarkimi universitetini ilinnialernissaat anguniarlugu periarfissinnissaannik Naalackersuisut eqqarsaatersuuteqarpat?**
- 8. Naalackersuisut Kalaallit Nunaanni ilinniarnertuunngorniarfinni “Gymnasielle supplerings kurser” aallartinnissaat anguniarlugu eqqarsaatersuuteqarpat?**

(Laura Táunâjik, Siumut)

Tungavilersuut

Ilisimatusarfiup ilinniartut qinnuteqartut qallunaatut oqaatsinik piginnaaneqarnerat aallaavigalugu ilinniartussanik akuersissuteqartarnersoq, imalunniit kalaallisut oqaatsinik piginnaaneqarnerat aallaavigalugu ilinniartussanik akuersissuteqartarnersoq paasissallugu soqutigivara.

Soqutiginninninnut pissutaavoq inuusuttunik oqaloqateqartarninni kalaallisut oqaasillit Ilisimatusarfimmi ilinniarfinni ilinniartunngornissaminnik qinnuteqartarsimagaluartut akuerisaasaratilli.

Meeqqat atuarianniit ingerlaqqinngitsoortartut ilisimavagut, kisiannili aarloqqutigaara GU-mit ilinniarnertuut kalaallisut oqaasillit Ilisimatusarfimmi ilinniarnissamik soqutiginnikkaluit ingerlaqqinngitsoortartut amerliartornissaat.

Kalaallisut oqaasillit Ilisimatusarfimmi ilinniarfinni ilinniartunngornissaminnik qinnuteqarsimagaluartut akuerisaanngitsut Danmarkimi universitetini ilinniarnissamik akuerisaasimasut naapittarpakka. Eqqarsarnarpoq kalaallit inuusuttut nunaminni oqaatsitik atorlugit ilinniarusuttut Ilisimatusarfimmiit taamannak akimmisaartinneqartarmata.

Ilinniartut qallunaatuinnaq oqaasillit pitsaanerusumik periarfissippagut, fagi kalaallisut soraarummeerutigisariaqanngimmatigit. Akerlianilli kalaallisut oqaasillit hovedfagip ataatsip peernissaanik periarfissinnagit.

Kissaatigaara apeqqutima ullut suliffiusut qulit iluanni akineqarnissaat